



## Ютуқлар бор, муаммолар ҳам

ТУМАНИМИЗДА жиноятчилик йилдан-йилга ошиб борапти. 1990 йилда 1989 йил билан таққослаганда, жиноятлар сони 54 тага кўпайган. Лекин ҳуқуқ-тартибот ходимлари ҳам ўз фаолиятларини такомиллаштириб боришмоқдалар. Утган йили 255 та оғир жиноят содир этилган бўлса, шундан 187 таси очилди.

Шу йил январь ойида эса 11 марта турли даражадаги жиноят содир бўлди. Ходимларимизнинг астойдил изланишлари туфайли еттита сиқош этилди. Атиги бир ой ичида еттита жиноятни аниқлаш ҳар ҳолда яхши кўрсаткич.

Аммо бир «лекин» и бор. Очиқ-ойдин айтишим мумкин. Қонунларимиз ҳали ниҳоятда бўш. Келинг, сийқаси чиққан гап бўлсада, яна бир бор чет элга назар ташлайдик. У ерда ҳуқуқ-тартибот посбонларининг оғзидан чиққан сўз оддий фуқаро учун қонун. Бизда-чи? Бирор шахсни жиноят устида қўлга олсангиз ҳам, сиз билан баҳслашади. Муқаррар берилажак жазодан қўрқинмайди, ҳаттоки. Шундан келиб чиқи милицияни муҳофаза қилиш ҳақидаги қонунни жиноят мажмуасини, кескин такомиллаштириш асносида ривожлантириш зарурлигини таъкидлаб ўтишни истардим.

Тўғри, гуручнинг ичида олмас бўлганидек, ноқонуний ҳатти-ҳаракатлари билан милицияни ёмон отлиққа чиқараётган ходимлар орамизда йўқ, деб айтолмаймиз. Бу гапим бутун жумҳуриятимизга тегишли. Милиция формасига номуносиб шахслар олдин ҳам бўлган, ҳозир ҳам бор. Лекин уларнинг пешонасига ёзиб қўйилмаган-ку, бу ички ишларга муносиб эмас, деб. Ана шу муаммо эди.

Жумҳуриятимиз ИИВ тармоғидаги илғор тажрибаларни қўллаш асносида ана шу муаммони маълум даражада ечишга муваффақ бўлди.

Ярим йилда ҳеч бўлмаганда бир марта меҳнат жамоалари ҳузурда ҳисобот бериб туришни йўлга қўйдик. Биз Тошкент тумани аҳлининг осойишталигини қўриқлашимизни, марҳамат қилиб фаолиятимизга баҳони халқ берсин. Ана шу йўлга ўтиб олдик.

Маълум бир кунни белгилаймизда, туман фирқа ва ижроия қўмиталари, прокуратура вакиллари иштирокида бирор корхона ёки хўжаликка борамиз. Меҳнат аҳли билан юзма-юз учрашув ўтказамиз. Уастка вакили қандай ишлаяпти, ДАН ходими ўзини хизмат жараёнида қандай тутапти, БХСС ходими фаолияти қандай? Ва ҳоказаларни оддий одамларнинг оғзидан эшитамиз. Халқ доно. Қўрқмасдан кимнинг қанақалигини юзига айтади, аяб ёки юз-хотир қилиб ўтирмайди. Биз эса шунга қараб иш кўрамиз. Халқ ибораси билан айтганда, яхши ошини ейди, ёмон бошини.

Ана шу аснода ДАН хизмати бўйича бир мунча таркибий ўзгаришлар қилдик. Шу хизмат раҳбарларини шартта ўзгартириб ташладик. Натижа ёмон бўлмади.

1989 йилда 43 та автофалокат рўй берган бўлса, 1990 йилга келиб 36 тага тушди бу рақам.

Сезиб хурсанд бўлаёلمиз, ички ишлар ходимларига оддий халқнинг муносабати бир мунча ўзгарди. Ишонч пайдо бўлди уларда, десам янглишмасам керак.

Карл Маркс номли жамоа хўжалиги эса ўша ердаги участка вакили, милиция капитани Акрам Раҳимбоевга «Москвич» автомашинаси ажратган. «Сельхозтехника» корхонаси (раҳбари С. Камолов), ДОСААФ (раҳбари Қ. Рашидов), жунни қайта ишлаш фабрикаси (раҳбари А. Ҳамидов) эса участка вакиллари ихтиёридаги техника воситаларини мунтазам равишда ённиги билан таъминлаяпти. Жунни қайта ишлаш фабрикаси яна Келесда милиция таянч пункти қуриш учун 20 минг сўм маблағ ажратди. Қўпгина давлат ва жамоа хўжаликлари ИИБга моддий жиҳатдан ёрдам беришга ваъда қилган. Буларнинг ҳаммаси — пул.

Агар халқ билан яқинлик вужудга келтирилмаган бўлса, милицияга ишонч туйғуси шаклланмаган бўлса, ким ҳам бир тийин берарди? Халқ ишончи бизга таскин берапти ва ишларимизни янада яхшилашга туртки бўлаёпти.

Лекин, афсуски, муаммоларимиз ҳали кўп. Юқордаги қонунда кўрсатилган бўлсада, замонавий техника воситалари билан таъминлаш даражаси паст. Рациялар етишмайди. Бутун бўлимида атиги иккита шаҳар телефони бор, холос.

Биз ўрганиб чиқдик, туманимиздаги оғир жиноятлар сабабчиларининг 80 фоизи четдан келганлар экан. Бу нимани кўрсатади?

Туманимизга «ташриф буюрган» нопок кимсалар фаолиятдан кўп ҳолларда кеч хабардор бўлаёلمиз. Дейлик, Тошкент шаҳрининг қайси бир туманида бир жиноятчи қочди. Ўша туман ички ишлар бўлими бу ҳақда шаҳар ИИБга хабар қилди, кейин вилоят ИИБ олади бу хабарни, кейин биз. Унгача туманимизга кириб келган жиноятчи билган номаъқулчилигини қилиб улгуради. Шу сабаб бўлиб баъзан фалон жиноятнинг олдини ололмадингиз, деган эътирозларни эшитишга тўғри келиб қолади. Тўғри, ҳеч нарса деёлмаймиз, айбисиз айбдор бўлиб қолаверамиз.

Агар Тошкент вилояти ИИБ раҳбарлари масаланинг ана шу томонига жиддий аҳамият беришса, хизмат савиямиз бундан ҳам яхшиланарди.

**Ҳилолиддин ОЛИМХУҲАЕВ,**  
Тошкент тумани ИИБ бошлиғи, милиция подполковниги.



1991 ЙИЛ — ЎЗБЕКИСТОНДА НАВОИЙ ИЛИ

## УЛУҒ ШОИРНИ ХОТИРЛАБ

Буюк мутафаккир, ғазал мулкнинг султони Алишер Навоий таваллудининг 550 йиллигини нишонлаш учун ўтган шанба кунни кенг жамоатчилик шеърият боғига тўпланди.

Улуғ бобомизнинг таъмирланган ҳайкали пойига беҳисоб гулчамбарлар қўйилди. Алишер Навоий хотирасига чексиз ҳурматини жумҳурият Президенти Ислоҳ Каримов, жумҳурият Вице-президенти Шукрулло Мирсаидовлар ҳам намойиш этиб, шеърият боғига ташриф буюришди.

Жумҳурият Президенти Кенгаши аъзоси, Ўзбекистон халқ шоири Шукрулло, ЎзССЖ Президенти ҳузурдаги Вазирлар Маҳкамаси раиси ўринбосари Эркин Самандаров, таниқли маданият арбоблари Алишер Навоийнинг шеърият бўстонидаги ўрни ҳақида, улус фаровонлиги ва осойишталиги йўлида кўрсатган ҳиммати ҳақида ҳаяжонлиб гапирдилар. Сўнгра йиғилганлар Навоий номидаги адабиёт музейини зиёрат қилдилар.

СУРАТЛАРДА: шоир хотирасига бағишланган маросимдан лавҳалар.

Ҳабибулла ШОДИЕВ олган суратлар.



## Ўзбек шоири, мутафаккири ва давлат арбоби Алишер Навоий таваллудининг 550 йиллиги муносабати билан эсдалик тангани муомалага чиқариш тўғрисида

СССР Давлат банкни ўзбек шоири, мутафаккири ва давлат арбоби Алишер Навоий таваллудининг 550 йиллиги муносабати билан 1 сўмлик эсдалик тангани муомалага чиқаради.

1 сўмлик эсдалик танга оқ рангли мис-никель қотишмасидан тайёрланган бўлиб, диаметри 31 миллиметр бўлган доира шаклидадир.

Танганинг ўнг ва тескари томонлари айланаси бўйлаб қабариқ ҳошия бўлади.

Танганинг ўнг томонига СССР Давлат герби жойлаштирилган, унинг остига «СССР» икки сатрга танганинг қийматини билдирувчи «1 рубль» ва зарб этилган йилни билдирувчи «1991» санаси ёзилади.

Танганинг тескари томонига Алишер На-

воийнинг қабариқ тасвири туширилади, унинг чап томонига доира бўйлаб «1441—1501» саналари бўлади, пастида икки сатрда «Алишер Навоий» сўзлари ёзилади.

Танганинг айланаси бўйлаб «Один рубль» сўзлари икки марта ўйиб ёзилиб, ораси икки нуқта билан ажратиб қўйилади.

Алишер Навоий таваллудининг 550 йиллиги муносабати билан чиқариладиган эсдалик танга 2,5 миллион дона бўлади, шу жумладан 0,35 миллион донасининг сифати яхшиланган.

Эсдалик танга тўловларнинг ҳамма турларига, шунингдек жорий ҳисоб варақаларига ёзишга, омонатга, аккредитив ва жўнатиш учун ҳеч бир чеклашсиз ўз қиймати бўйича қабул этилиши мажбурийдир.





